

SURANA PAUL TO JAMA'A I FILIPI

POGAU BHAA-BHAANA

Jama'a i Filipi satotuuna o jama'a mobhaa-bhaana ipakarona Paul i Eropa. Tampana Kota Filipi adhaangia i Makedonia, saangu poropinsi i nuncana pamarintana Roma. *Surana Paul To Jama'a i Filipi* sii atoburi wakutuuna o Paul tangasaana atotorongku. Tee namisina Paul tangasaana amarewu incana roonamo dhaangia tee miana Karasiteni mobhalia. Tee uka roonamo i nuncana jama'a i Filipi sumai dhaangia tee manga mia moadhariakana manga kaadhari mosaladhala. Maka moomini mboo sumai o antona surana Paul sii akoantoaka manga bhoasaka mokaunde-unde tee mobukeakana kaharapu. Opea o sababuna mbakana mboo sumai? Atantumo inda tee mosagaanana soo rampaakana o Paul aparacaea mpuu tee Al Masi.

Paul aburi sura incia sii roonamo bhaa-bhaana incia gauna apotarimakaasi tee manga jama'a i Filipi to kadhawu mopadhana itarimana mi-naaka i manga incia wakutuuna o Paul adhaangia i nuncana kasukara. Tee i nuncana kalalesana aburi sura incia sii o Paul uka gauna apayaakini manga jama'a i Filipi mamudhaakana abarani tee asabara aaro kasukara. Paul aemani mpuu mamudhaakana manga incia apaporitambe karoni mboomo Isa, tee inda akuasaia inca mosombo tee soo aose kapeeluana karoni.

Paul audhaniaka manga incia uka ande soo rampaakanamo rahumatina Aulata'ala momembalina mopaposaanguna manga incia tee Al Masi mboo opea o kaparacaeana manga incia tee Isa, mencuana roonamo manga incia ata'ati apewaua manga tutura itantuaka i nuncana agamana miana Yahudi. Sapadhana incia sumai, Paul aburi uka pokaina tee giuna kaunde-unde tee dhadhi malape idhawuakana Aulata'ala to manga mia modhadhina moposaanguna tee Al Masi.

Posalana sura incia sii tee sura mosagaanana satotuuna o sura incia sii ahususuaka kaunde-unde, pekatangkaana inca, posaangua, tee kasabarana miana Karasiteni wakutuuna apotaangiaka kaparacaeana tee Al Masi tee tuaapa tadhadhi tamembali miana Karasiteni. Sura incia sii asusuaka uka tuaapa o kamaasiakana Paul tee jama'a i Filipi sumai.

Antona

Porikanaana pogau 1:1-11

Kadhaangiana Paul 1:12-26

Dhadhina miana Karasiteni 1:27--2:18

Haejati to Timotius tee Epafroditus 2:19-30

Kaudhaniaka tee manga musu mominaakana i

sambali tee mominaakana i nunca 3:1--4:9

Paul tee manga sabhangkana i Filipi 4:10-20

Kapadhaana pogau 4:21-23

Salamu

1:1-2

¹ Minaaka i Paul tee Timotius, manga bhatuana Isa Al Masi. To bhari-bharia mia mosaalihi i nuncana saroni Isa Al Masi i Kota Filipi tee

manga kapalana jama'a tee manga mia molaian-ina uumati.

² Rahumati tee dhadhi pomalape minaaka i Aulata'ala, Amata, tee minaaka i Isa Al Masi, Oputa Momalanga, apoose tee ingkomiu.

Emaniana Sukuru tee Do'a

1:3-11

³ Iaku kuemani sukuru i Aulata'ala gagari ku-udhanikomiu.

⁴ Gagari kuemaniakakomiu do'a, iaku sadia kupewaua tee kaunde-unde.

⁵ Iaku kupotarimakaasi tee Aulata'ala roonamo minaaka i eo bhaa-bhaana tee sakawana sii-sii ingkomiu umembali sabhangkaku sakarajaa to tapakawaaka Lele Malape.

⁶ Rampaakanamo sumai kuyaakini ande o Aulata'ala mopepuungina karajaa momalape i tanga-tangamiu, bheapatorosua sakawana o karajaana sumai amondo i eona Isa Al Masi ambuli pendua.

⁷ Inciamo alaenga ande kufikiriakakomiu mboo sumai, roonamo bhari-bharikomiu kudhikakomiu i nuncana ngangarandaku. Tee uka roonamo ingkomiu upoose upobhawa-bhawa tee iaku wakutuuna kutarima rahumati idhawuakana Aulata'ala, malape iaku dhaangiapo i nuncana katorongku atawa wakutuuna kudhaangiapo i sambali to kuewaaka tee kupotaangiaka ande o Lele Malape sumai abanara.

⁸ Aulata'ala o sakusiiku ande iaku kupemelili-akakomiu tee kaasina incana Isa Al Masi.

⁹ Siimo do'aku to ingkomiu: maasangia ingkomiu uhandu umaasiaka Aulata'ala tee uhandu

upomaamaasiaka podho-podho ingkomiu. Iaku uka kudo'a maasangia o kaasimiu ahanda ajulu i nuncana katau mobanara tee uka umembali mia mokofikirina mo'aarifu,

¹⁰ sabutuna ingkomiu umembali upili moma-lapena mpuu. Tee mboo sumai, wakutuuna umbaana Al Masi o dhadhimiu amangkilo tee inda upewau kasalaha,

¹¹ abukeaka tee bhakena kabanara ikarajaana Isa Al Masi to amuliangiaka tee apuji Aulata'ala.

Kasakusiina Paul i nuncana Katorongku

1:12-26

¹² E manga witinaiku, iaku gauku ingkomiu umataua ande manga giu ipotibhaakaku tee in-amisiku sakiaia sii siitumo imembaliakana sa-handana abhari o mia morangona tee moparacaeana Lele Malape sumai.

¹³ Aahirina sii-sii bhari-bharia pande jagana malige tee manga mia mosagaanana amataumea ande iaku kutotorongku tee rante ase rampaakanamo kulaiani Al Masi.

¹⁴ Tee rampaakanamo kutotorongku tee rante ase, alabhi o kabharina witinaita mohandana moyaakinina i nuncana saroni Kawasana Opu minaaka i pande jagana malige mosagaanana inda moparacaea, sabutuna manga incia ahanda abarani, tee inda anamisi kaeka wakutuuna apakawaaka firimanina Aulata'ala.

¹⁵ Inciamo dhaangia pia-pia mia mopakole-leakana Al Masi rampaakanamo agigibuluaku tee apeelu apotagali, maka dhaangia uka mopakole-leakana Al Masi tee neati momalape.

¹⁶ Manga mia mopakoleleakana Al Masi tee neati momalape sii apewaua rampaakanamo amaasiakaaku, roonamo manga incia atotuu-totuu amataua ande o Aulata'ala padhamo alam-bokoaku iwe sii mamudhaakana kubukutiiakea o Lele Malape sii abanara.

¹⁷ Sainamo manga incia mopakoleleakana Al Masi tee haejati inda mo'ihilasi; giu incia sumai manga incia apewaua tangkanamo to aose kapeeluna karona tee mboo sumai aharapu amembali apajulu katamona kanarakaaku i nuncana katorongku.

¹⁸ Maka inda apokia! Roonamo moomini tuaapa, malape tee neati mobanara atawa tee neati mosala, dhaanamo sadhaadhaa o Al Masi atopakoleleaka uka. Hali incia sumai amasanaakea incaku, tee kukaunde-undeakea,

¹⁹ roonamo kumataua ande iaku bhekutopabebasi, rampaakanamo ingkomiu udo'a to iaku tee kahamba minaaka i Rohina Isa Al Masi.

²⁰ Giu ipemeliliakaku tee iharapuku satotuu-na mamudhaakana bholi sampeampearo kutopekaea i nuncana tugasiku. Maka tee bhari-bharia kabaraniku, mboomo i wakutuu mola-pana tee uka i wakutuu sii-sii, Al Masi atomuliangi i nuncana karoku, malape alaloi dhadhiku atawa alaloi mateku.

²¹ Roonamo ifikiriku, ma'anana dhadhiku satotuuna o kalalesa to kulaiani Al Masi, tee o mate sumai satotuuna o laba to karoku.

²² Maka ande sadhaadhaana kudhadhi i dunia sii, iaku dhaangia kumembali kupewau giu mokoguna, sumaimo iaku inda kumataua iapai

o giu bheipiliku sadhaadhaa bhekudhadhi atawa bhekumate,

²³ roonamo dhaangia rua giu o hali mopa-jungkuaku. Iaku gauku mpuu kubholia o dunia sii to kulingka kumboore tee Al Masi, roonamo giumo incia sumai momalapena mpuu to iaku.

²⁴ Maka, rampaakanamo ingkomiu, salabhina kusadhaadhaa kudhadhi i dunia sii mamudhaakana kutulungikomiu.

²⁵ Rampaanamo sumai, iaku kuyaakini ande bhekusadhaadhaa kudhadhi mamudhaakana kumembali kutulungikomiu umembaliaka uhandu umaju tee ukaunde-unde i nuncana iimanimiu.

²⁶ Tee mboo sumai, alaloi umbaku pendua i tanga-tangamiu, kaunde-undemiu i nuncana saronu Isa Al Masi ahanda ajulu rampaakanamo iaku.

Kaudhaniaka mamudhaakana Sadhaadhaa Upotaangi
1:27-30

²⁷ Rampaanamo sumai, giu mofaraluuna mpuu siitumo ande ingkomiu tabeana udhadhi upapokanea tee opea iadhariakana i nuncana Lele Malape pokaiana tee Al Masi. Iaku inda kumataua buakana naile itu bhekuumba tee kupokawa tee ingkomiu atawa inda. Maka, kuharapu iaku bhekurangoa ande ingkomiu sadhaadhaa udhaangia i nuncana saangu rohi tee saangu fikiri, upobhawa-bhawa uewaaka iimani mominaakana i Lele Malape,

²⁸ tee ingkomiu bholi umaeka saidhe uka tee manga mia mobhalikomiu. Ingkomiu tabeana

ubarani mamudhaakana manga incia amataua ande manga incia dhaanamo bheabinasa tee ingkomiu bheutopasalaamati alaloi Aulata'ala.

²⁹ Rampaakanamo Al Masi, ingkomiu arahumatiakakomiu kalalesa mencuana tangkanamo to uparacaea tee Incia, maka unarakaa uka to Incia.

³⁰ Sii-sii ingkomiu upoosemo tee iaku i nuncana potimbea mopokana, siitumo mboomo opea mopadhana ikamatamiu ipotaangiakaku i piamo itu, tee dhaangiapo uka kupotaangiakea sakawana sii-sii, mboomo mopadhana irangomiu.

2

Kaudhaniaka mamudhaakana Taposaangu tee Tapaporitambe Karota mboomo Al Masi

2:1-11

¹ Ingkomiu umakaa roonamo uposaangumo tee Al Masi. Tee ingkomiu utohiburumo roonamo Al Masi momaasiakakomiu! Ingkomiu upoose i nuncana Rohina Aulata'ala, tee ingkomiu uka upomaamaasiaka tee upomalamalape podhopedho ingkomiu.

² Rampaakanamo sumai, mamudhaakana akaunde-unde ngangarandaku ingkomiu upewaumea manga giu incia sii: udhikamea o kaasi mopokana, hengguna ingkomiu usainca, usafikiri tee usahaajati mopokana.

³ Bholi dhaangia mopewauna saangu hali rampaakanamo to apotibhaaka kafaraluuna karona

atawa to asomboaka karona, maka to ingkomiu tabeana upaporitambea o karomiu, tee uabhia ande o mia mosagaanana alabhi amulia minaaka i karomiu.

⁴ Tee bholi soo ufikiriaka opea ifaraluumiu, maka ufikiriakea uka tee opea ifaraluuna mia mosagaanana.

⁵ Ingkomiu tabeana ukosifatu tee ufikiri mboomo Isa Al Masi:

⁶ Moomini o Isa akosifatuaka bhari-bharia sifatuna Aulata'ala,
Incia inda aabhi kauncuramakana mboomo Aulata'ala
mboomo giu mofaraluuna ipotaangiaka.

⁷ Maka Incia apaporitambe karona tee abholia bhari-bharia sumai,
kasiimpo aala kauncuramaka mohina mpuu
tee amembali bhatua,
tee aumba i dunia sii amembali maanusia biasa.

⁸ I nuncana kadhaangiana amembali maanusia,
Isa alabhi uka apaporitambe karona to ata'ati kapeeluana Aulata'ala,
tee apasarakaaka badana sakawana amate,
tee uka sampe amate atosalib.

⁹ Rampaakanamo sumai o Aulata'ala apekalangea mpuu
tee arahumatiakea saro i bhawona bhari-bharia saro.

¹⁰ Aulata'ala apewaua mboo sumai mamudhaakana bhari-bharia mia
modhaangiana i sorogaa, i dunia, tee i tambena alamu bheasuju asomba Isa,

¹¹ tee bhari-bharia mia bhea'akuia ande o Isa Al Masi satotuuna o Kawasana Opu,

tee mboo sumai o Aulata'ala Ama atomu-
liangi.

Umembalimo Uumati Ipeeluna Aulata'ala

2:12-18

¹² Rampaakanamo sumai manga witinai imaasiakaku, mboomo tuaapa o kata'atimiu tee iaku, sii-sii u'usahamo to udhadhiaka tee cara molaenga to mia mopadhana ipasalaamatina Aulata'ala, tee umaeka i Aulata'ala tee uhoromatia. Bholi upewau giu incia sumai rampaakanamo dhaangiapo kupobhawa tee ingkomiu, maka salabhina upewaua wakutuuna inda tee iaku.

¹³ Roonamo Aulata'ala mokarajaana i nuncana karomiu mamudhaakana urela tee umembali upewau apokana tee ihaejatiakana Aulata'ala momalape sumai.

¹⁴ Karajaamo opeapo uka tee bholimo ukamburu-mburu atawa upogera-gera,

¹⁵ mamudhaakana inda ukobalaci tee umangkilo, tee umembali manga anana Aulata'ala inda mokokadhingkula i tanga-tangana kaomu inda momakatena ngangarandana tee mosaladhalana sii, sabutuna i tanga-tangana manga incia, ingkomiu ukocahea mboomo manga kalipopo i nuncana dunia.

¹⁶ Ingkomiu uka tabeana ususuakea o firimani modhawuna dhadhi to manga incia. Tee mboo sumai iaku kumembali kubangga wakutuuna Al Masi aumba naile itu, roonamo garaaka inda asia-sia ku'usaha tee kumangule.

¹⁷ Aipomo iaku bhekutopekamate, maka moomini o raaku atobusaka i bhawona kurubani

tee ibaadatina pasombaana iimanimiu, iaku kumasanaa tee kukaunde-unde tee bhari-bharikomiu.

¹⁸ Mboomo uka ingkomiu tabeana ukaunde-unde tee umasanaa upobhawa-bhawa tee iaku.

Timotius tee Epafroditus

2:19--3:1a

¹⁹ I nuncana saronā Isa Al Masi Oputa Moma-langa, iaku kuharapu to alambokoakakomiu Timotius mamudhaakana kutanangi tee kutohiburu sarangoku lelemiu.

²⁰ Roonamo inda dhaangia o sabhangka sakarajaaku mopokanana tee Timotius mompuu-mpuuna incana mofaduliakakomiu.

²¹ Roonamo mia mosagaanana dhaangiapo apeelo ifaraluuna karona, mencuana apeelo kafaraluuna Isa Al Masi.

²² Ingkomiu umataua o Timotius padhamo abukutiiaka karona ande incia akoharagaa mpuu. Mboomo samia ana tee amana, incia apoose tee iaku tee ahambaaku wakutuuna kupakawaaka Lele Malape.

²³ Rampaakanamo sumai, iaku kuharapu kumadhei kulambokoakakomiu Timotius, samatauku tee opea bhemomembalina tee parakaraku sii.

²⁴ Maka iaku kuparacaea ande tee katulungina Kawasana Opu, indamo amangenge iaku bhekuleongikomiu uka.

²⁵ Moomini mboo sumai, kuabhia afaraluu to kulambokoakakomiu pendua witinaiku, sabhangkaku sakarajaa, tee sabhangkaku wakutuuna kupoewangiaka Lele Malapena Isa Al Masi,

siitumo Epafroditus. Incia ilambokomiu to aham-baaka opea ifaraluuku.

²⁶ Incia apemeliliakakomiu mpuu, tee alilaho roonamo ingkomiu urangomea o lлена ande incia amapii.

²⁷ Inciamo atotuu incia amapii tee saidhepo amate. Maka o Aulata'ala dhaangiapo amaasi-akea tee atulungia. Aulata'ala mencuana soo amaasiaka incia, maka amaasiakaaku uka mamudhaakana o kaporona incaku inda ahanda.

²⁸ Rampaakanamo sumai ahandamo mpuu kapeeluku to kutumpua ambuli tee ingkomiu to upokawa tee incia, mamudhaakana ingkomiu ukaunde-unde pendua. Tee mboo sumai o ngangarandaku amembali atanangi.

²⁹ Jadi, upepagomea incia i nuncana sarona Kawasana Opu tee ngangaranda mokaunde-unde tee uhoromatimea bhari-bharia mia mboo sumai.

³⁰ Incia saidhepo amate rampaakanamo kala-ianina tee Al Masi i wakutuuna ataa inyawana to apamondoaka opea mokurana i nuncana usahamui to utulungiaka iaku.

3

^{1a} E manga witinaiku, aahirina ukaunde-undemo i nuncana sarona Kawasana Opu.

Kabanara Mototuu *3:1b-11*

^{1b} Inda apokia ande iaku kuburia pendua opea mopadhana ipaumbaakaku to ingkomiu, roonamo manga giu incia sumai ajaganikomiu.

2 Pengkaanakamo tee manga mia moko'isikadina mboomo mantoa, pengkaanakamo tee manga pande momadhakina fe'elina, tee pengkaanakamo tee manga pande tandaki gau-gau mopakisaana mia to atotandaki mamudhaakana atopasalaamati.

3 Garaaka manga mia mototuu-totuuna mototandaki sumai o ingkitamo tee mencuana manga incia. Roonamo Rohina Aulata'ala momangahambana to ta'ibaadati i Aulata'ala, tee ingkita tamasanaa mpuu roonamo tadhadhi i nuncana sarona Isa Al Masi, tee uka ingkita inda taposaronaka tee manga tutura ipadhaangiana maanusia,

4 moomini satotuuna iaku kumembali uka kuposaronaka tee manga tutura ipadhaangiana maanusia.

Roonamo ande dhaangia o mia ako'alasa to aharapu tee manga tutura ipadhaangiana o maanusia, sumaimo iaku alabhi uka minaaka i mia incia sumai.

5 Iaku kutotandaki wakutuuna kuko'umuru walu eo. Iaku o miana Israel minaaka i lipu Binyamin, miana Ibrani asilii. Pokaiana tee kata'atiku tee Hukumuna Taurati, iaku sala samia mominaakana i rombongana Farisi.

6 Pokaiana tee antona ngangarandaku moka-rore-rore to kuewaaka agama Yahudi, iaku kumenturu kusikisaa manga jama'a moparacaeana tee Isa. Iaku inda tee kabalaciku i nuncana giu kuose bhari-bharia Hukumuna Taurati.

⁷ Maka rampaakanamo Al Masi, bhari-bharia giu ipewauku piamo itu kuabhia amembali saangu giu mokoharagaa, sii-sii amembalimo giu inda mokoharagaa.

⁸ Mencuana soo incia sumai, maka moomini bhari-bharia hali kuabhia soo amembali manga giu mopekarugiaku. Roonamo sii-sii iabhiku mokoharagaana mpuu siitumo iaku kumataua tee kunamisia ande dhadhiku i nuncana o Isa Al Masi, Oputa Momalanga. Rampaakanamo kulaiani Incia kurambasakamea bhari-bharia mopadhana ipewauku piamo itu tee bhari-bharia sumai padhamo kubhanakea i tampana rewu, mamudhakaana kumembali kutarima Al Masi,

⁹ tee kuposaangu totuu-totuu tee Incia, mencuana rampaakanamo kabanara modhaangiana i karoku tee cara kuose Hukumuna Taurati, maka rampaakanamo iimaniku i nuncana saroni Al Masi, siitumo o kabanara moubana minaaka i Aulata'ala roonamo kuparacaea tee Al Masi.

¹⁰ Sii-sii iaku tangkanamo kupemeliliaka to kupomatau tee Al Masi tee gauku kunamisia uka o kuasana Aulata'ala, wakutuuna Incia apadhadhi pendua Al Masi minaaka i mate. Iaku gauku kunamisia o kanarakaa inamisina Incia, tee kumembali mboomo Incia morelana monarakaa sakawana amate,

¹¹ tee mboo sumai iaku kuharapu ande Aulata'ala bheapadhadhiaku uka pendua minaaka i mate.

*Buntuli Sakawana i Tujuata
3:12-16*

¹² Iaku kupogau mboo sumai mencuana roonamo amondomo opea itujuku. Maka iaku kutorotorosu ku'usaha to kupotibhaaka hadia ipasadiaakana Isa Al Masi, roonamo Incia padhamo arakoaku tee apamembaliaku pewauana.

¹³ E manga witinaiku, iaku inda kufikiri ande iaku padhamo kupotibhaaka hadia sumai. Maka dhaangia saangu hali ipewauku, siitumo iaku kumendeu kufikiriaka opea modhaangiana i talikuku tee ku'usaha tee mpuu-mpuuna incaku to kupotibhaaka opea modhaangiana i aroaku.

¹⁴ Rampaakanamo sumai, iaku kubuntuli torosu sakawana i tampa itujuku to kupotibhaaka hadia, siitumo kakembana sorogaa minaaka i Aulata'ala i nuncana sarona Isa Al Masi.

¹⁵ Bhari-bharikita satotuuna manga miana Karasiteni moko'umuru i nuncana giu ta'iimani, ingkita tabeana takofikirimo mboo sumai, tee ande dhaangia i tanga-tangamiu moposalana fikiri tee manga giu incia sii, sumaimo Aulata'ala bheahambakomiu mamudhaakana tamembali tama'anaia tuaapa o carana tafikiri mototuuna.

¹⁶ Maka o giu incia sii tabeana taudhanian: Inggkita tabeana tadhadhi apokana tee opea ipotibhaakata sakawana sii-sii.

Kaudhaniaka to Jama'a

3:17--4:1

¹⁷ E manga witinaiku, osemea opea ipewauku tee ukamatamea pekalape manga mia moosena sandarana karomami sumai.

18 Iaku kumenturu kupaumbaakakomiu, tee sii-sii kupendua kupaumbaakakomiu tee kupoose kutangi ande abhari o mia momembalina musuna kau salibna Al Masi i nuncana dhadhina.

19 Kapadhaana dhadhina manga mia mboo sumai bheabinasa, roonamo opea isombana manga incia siitumo kapeeluana badana, tee ipewauna sumai satotuuna o giu motomaeaaka tee manga incia abangga apewau manga hali incia sumai. Manga incia tangkanamo afikiriaka manga giu ipeeluna manga mia i dunia sii.

20 Maka ingkita o miana sorogaa. Minaakamo uka iwe sumai bheaumba Mangapasalaamatina mopadhana iantagita, siitumo Isa Al Masi, Oputa Momalanga.

21 Inciamo bhembhaliina badata mohina sii apamembalia apokana tee badana momulia. Giu incia sumai apewaua tee kuasana momembalina mopekatalona bhari-bharia giu.

4

1 Rampaakanamo sumai, e manga witinai imaasiakaku tee ipemeliliakaku, ingkomiumo momembalina kasanaaku tee mahakotaku, kakaromo upekatangka i aroana Kawasana Opu, e manga witinaiku imaasiakaku!

Kaudhaniaka Kapadhaa

4:2-9

2 Iaku kuemani mpuu i Euodia tee Sintikhe mamudhaakana ingkomiu usainca tee upokana o fikiri roonamo ingkomiu uparacaea tee Kawasana Opu.

³ Kasiimpo to sabhangkaku sakarajaa* iparacaeaku, iaku kuemani mpuu mamudhaakana utulungi rua miaia witinaita bhawine sumai. Roonamo manga incia padhamo amangule apobhawa tee iaku wakutuuna ingkami tapakoleleaka Lele Malape minaaka i Aulata'ala; apokana mboomo Klemens tee bhari-bharia mia mosagaanana molaianina Aulata'ala mopobhawa-bhawana tee iaku. Atantumo sarosarona manga incia atoburi i nuncana Kitabina Mia Modhadhina i sorogaa.

⁴ Maasangia ingkomiu sadia ukaunde-unde i nuncana sarona Kawasana Opu! Sampearopo uka iaku bhekupogau, kaunde-undemo!

⁵ Taroakamo kaluluna incamiu akamatea bhari-bharia mia. Roonamo Kawasana Opu amakasumo aumba!

⁶ Bholi dhaangia ililahoakamiu, maka pakawaakamea bhari-bharia ipeelumiu i Aulata'ala alaloi do'a tee opeapo uka iemanimiu alaloi kasukuru tee tarimakaasi.

⁷ Tee dhadhi momasanaa minaaka i Aulata'ala bheajagani ngangarandamiu tee fikirimiu roonamo uposaangu tee Isa Al Masi. Dhadhi momasanaa sumai alabhi minaaka i opea momembalina ima'anaina maanusia!

⁸ Aahirina, e manga witinaiku, antokia pabukea o fikirimiu tee hali mobanara, momulia, mo'adili, momangkilo, momakesa, manga giu molaengana motohoromati, siitumo bhari-

* **4:3 4:3** *sabhangkaku sakarajaa*: Pogau ima'anai 'sabhangkaku sakarajaa' iwe sii atoma'anai uka amembali sarona mia, siitumo *Sizigus*.

bharia giu momalapena mpuu tee molaengana motopuji.

⁹ Pewaumea bhari-bharia giu mopadhana ipengkaadhariakamiu, mopadhana itarimamiu, irangomiu, tee ikamatamiu minaaka i iaku. Sumaimo Aulata'ala minaana dhadhi momalape sumai bheapoose tee ingkomiu.

Potarimakaasiana to Kadhawuna Jama'a
4:10-20

¹⁰ Iaku kukaunde-unde mpuu i nuncana sarona Kawasana Opu, roonamo sapadhana amangengena wakutuuna, siimpo sii-sii ingkomiu upepu-umo pendua ufaduliakaaku. Inciamo minaaka i piamo itu ingkomiu ufaduliakaaku, maka inda tee kalalesamiu to ususuakea.

¹¹ Iaku kupogau mboo sumai mencuana roonamo tee kakurangaku, roonamo iaku padhamo kupengkaadhariakea tuaapa o carana mamudhaakana inda tee ikuraakaku i sagala giu kadhaangia.

¹² Iaku padhamo kunamisia kudhadhi kukakuranga, tee tuaapa o namisina kudhadhi o kolabhi. I nuncana kadhaangia opeapo uka, malape kumambosu atawa kumaara, malape kukolabhi atawa kukakuranga, iaku kupotibhaakamea o rhasiana to kunamisiaka atumpu incaku minaaka i bhari-bharia kadhaangia mboo sumai.

¹³ Tee kuasana Al Masi idhawuakana to iaku, sumaimo iaku dhaangia tee kakaaku mamudhaakana amembali kukapoia bhari-bharia kadhaangia mboo sumai.

¹⁴ Maka ingkomiu padhamo utulungiaku mi-naaka i kanarakaaku, tee opea ipewaumiu sumai inciamo amalape.

¹⁵ E manga miana Filipi, ingkomiu umataua wakutuuna kubholi poropinsi Makedonia i piamo itu, tee wakutuuna bhaa-bhaana kupakawaaka Lele Malape, inda dhaangia o jama'a mosagaanana mohambaaku i nuncana giu adhawu tee atarima kahamba, maka tangkanamo ingkomiu mohambaaku.

¹⁶ Wakutuuna iaku i kota Tesalonika, dhaangia pia mpearo ulambokoakaaku giu ifaraluuku.

¹⁷ Mencuana kadhawumiu sumai iharapuakaku, maka o amalamiu, roonamo giu incia sumaimo ihandaakana abhari o labamiu.

¹⁸ Bhari-bharia padhamo kutarimaia tee ako-labhi. Iaku indamo tee kakurangaku sapad-hana kutarimaia minaaka i Epafroditus bhari-bharia kahamba ilambokomiu. Manga kadhawu-miu sumai satotuuna saangu pasombaa moma-wondu tee kurubani molaengana ipasombaaka to Aulata'ala. Aulata'ala atarimaia o kurubani incia sumai tee apeelua mpuu.

¹⁹ Aulata'ala bheadhawuakakomiu bhari-bharia opea ifaraluumiu apokana tee karangkaeana momulia i nuncana sarona Isa Al Masi.

²⁰ Atopujimo Aulata'ala o Amata sa'umurua! Amin.

Salamu Kapadhaa
4:21-23

²¹ Pakawaakea o salamuku to bhari-bharia mia mosaalihi modhaangiana i nuncana saronā Isa Al Masi. Salamu to ingkomiu minaaka i manga witinaita mopoosena tee iaku iwe sii.

²² Salamu to ingkomiu minaaka i bhari-bharia mia mosaalihi, ihususuaka mpuu to manga incia modhaangiana i nuncana maligena Kaisar.

²³ Rahumati minaaka i Isa Al Masi, Oputa Momalanga, apoose tee rohimiu. Amin.

Kitabi Momangkilona Wolio

Wolio: Kitabi Momangkilona Wolio (New Testament+)

copyright © 2024 Wycliffe Bible Translators, Inc.

Language: (Wolio)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

- You include the above copyright and source information.

- If you make any changes to the text, you must indicate that you did so in a way that makes it clear that the original licensor is not necessarily endorsing your changes.

- If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-10

PDF generated using Haiola and XeLaTeX on 26 Jul 2025 from source files dated 10 Jul 2025

7df9af1f-1c49-59d2-a164-bde0a20127b3